



Dok u **SIPA** još traju provjere kandidata za ministra, analiziramo njegov "status"



# Dautbašiću samo zatvor može oduzeti fotelju

ZVIZDIĆ  
ODLUČUJE  
JE LI ON  
PRIHVATLJIV

CIK BiH samo u slučaju zatvorske kazne veće od pola godine ima pravo da reaguje i oduzme mandat



**SUAD ARNAUTOVIĆ:**

S aspekta nadležnosti, CIK je postupio u skladu sa zakonom



**KRISTINA JOZIĆ:**

Zahtjev smo zaprimili 12. januara, a rok za provjere je 30 dana



**SREĆKO LATAL:**

Nekoga iz zatvora postaviti za ministra stvar je političke kulture

**Almedin ŠIŠIĆ**

**SARAJEVO -** Ukoliko bude imenovan za državnog ministra, Bakiru Dautbašiću, suspendovanom sekretaru Ministarstva sigurnosti BiH, koji je trenutno u pritvoru, mandat bi bio oduzet samo ukoliko u mogućem procesu protiv njega bude osuđen na zatvor duži od šest mjeseci.

Novonastalu situaciju u slučaju "Dautbašić" juče je pojasnio Suad Arnautović, profesor na Fakultetu političkih nauka u Sarajevu i član CIK-a BiH, navodeći da iznosi osobno mišljenje.

Na pitanje koji je trenutno Dautbašićev "status", budući da je i dalje kandidat za ministra bez obzira na to što je u pritvoru i suspendovan sa dužnosti koju obnaša, Arnautović odgovara da CIK BiH samo u slučaju zatvorske kazne veće od pola godine ima pravo da reagira i oduzme mandat.

Pri tome, ni uvjetna kazna ništa ne mijenja, već praktično abolira kandidata.

"S aspekta nadležnosti, CIK je već postupio u skladu s Izbornim zakonom i Zakonom

o Vijeću ministara, a **SIPA** treba da provjeri istinitost podataka kandidata i to dostavlja predsjedavajućem Vijeća ministara", podsjeća on.

Maksida Pirić, portparol CIK BiH, kaže da je zakonom tačno precizirano koje provjere vrši Komisija.

"Što se tiče njega i drugog kandidata za ministra (Sead Jusić), provjeravali smo da li su registrovani birači, da li imaju izrečene sankcije zabrane obavljanja javnih dužnosti, da li ima smetnji propisanih Izbornim zakonom. I za obojicu je utvrđeno da nema smetnji", pojašnjava Pirićeva.

Iako su prošle gotovo dvije sedmice otkako je loptica prebačena na njihov teren, u **SIPA** još nisu završili provjere.

"Zahtjev smo zaprimili 12. januara, a zakonski rok za provjere je 30 dana, tako da provjere i dalje traju", kazala je



**NI USLOVNA KAZNA NIŠTA NE MIJENJA, VEĆ PRAKTIČNO ABOLIRA KANDIDATA**

Kristina Jozić, portparol **SIPA**.

Na pitanje mijenja li se bilo šta Dautbašićevom suspenzijom (budući da ga je ministar sigurnosti suspendovao nakon što su počele provjere), Jozićeva odgovara da **SIPA** "samo provjerava istinitost podataka".

Dakle, ukoliko prođe i ovu provjeru, a sve su prilike da hoće, sve je na Denisu Zvizdiću, predsjedavajućem Vijeća ministara, koji juče nije odgovorao na naše pozive. Za Srećka Latala, urednika BIRN-a za BiH i direktora analitičke organizacije SOS, "nekoga iz zatvora postaviti za ministra" u ovom trenutku stvar je političke kulture, a nikako pravno pitanje.

"S jedne strane, ovo možda jeste nesvakidašnja situacija, ali s druge, moramo biti legalisti i dok se ne dokaže suprotno - Dautbašić je nevin", ističe Latal.

Osim što već mjesec i po funkcioniра otežano, bez ministra jednog od ključnih ministarstava (i jednog zamjenika), ovo Vijeće ministara moglo bi ostati upamćeno i kao "krnja državna vlada" za čijeg su mandata državni organi predali aplikaciju za članstvo u EU.